

# Peb ua tau dab tsi?

Qhov thib ib, qhov tseem ceeb tshaj plaws uas peb ua tau yog ua kom cov khib nyiab uas peb muab pov tseg tsawg zog.



Ib txhia neeg sim ua kom “tsis txhob muaj khib nyiab hlo li.” Peb ua tau li no yog tias peb ua tib zoo xaiv tej yam peb yuav thiab ua. Piv txwv hais tias, Charles siv ib lub thermos ntim nws cov kav fes nqa mus hauj lwm, kom nws thiaj li tsis siv cov khob ntawv los sis tsis muab cov khob ntawv pov tseg.




Charles tus phooj ywg Mary nyiam haus dej dawb. Mary kuj yuav tau ib hwj dej txhua hnub ntawm ib lub tshuab muag dej thiab muab cov hwj pov tseg hauv ib lub thoob cia cov hwj uas yuav muab hloov ua lwm yam (recycle). Tiam sis Mary tsis ua li ntawd, nws nqa ib lub hwj dej uas nws rov qab siv tau ntau zaus hauv tsev mus kom nws thiaj li txuag tau nyiaj thiab ua rau nws cov khib nyiab tsawg zog.



Koj los yeej ua tau kom koj cov khib nyiab tsawg dua thiab. Lwm zaus koj ntxuav koj ob txhais tes thiab koj muaj kev xaiv siv lub tshuab tshuab cua sov los sis ib daim ntawv so tes, cia li siv lub tshuab tshuab cua sov. Ua li no koj yuav tsis tsim khib nyiab hlo li thiab koj thiaj yuav “tsis txhob muaj khib nyiab hlo li” uas yuav tsum muab pov tseg.



Rov qab siv (reuse) tej khoom dua, es tsis txhob muab pov tseg. Piv txwv hais tias, neeg feem coob mus tom taj laj yuav khoom noj thiab nqa hnab yas ntim khoom los tsev txhua lub lim piam. Cov hnab yas no yus muab hloov ua lwm yam los tau, tiam sis qhov zoo dua yog rov qab siv cov hnab yas ntawd thaum peb mus taj laj lwm zaus. Peb tsis txhob rawm muab cov hnab yas ntawd hloov ua lwm yam los sis muab pov tseg mus txog thaum cov hnab yas ntawd ntuag es siv tsis tau lawm.



Thaum tej yam uas peb xav yuav tsis muaj nyob hauv ib lub hwj uas yuav rov qab siv tau, qhov zoo tshaj yog yuav tej yam no uas muaj nyob hauv tej hwj uas muab hloov ua lwm yam tau. Charles tus poj niam nyiam haus dej qab zib Coke. Nws yuav cov hwj yas uas lub hau ntswj tau, es yog tias nws haus tsis tas no nws thiaj muab tso tau rau hauv tub yees, es ib chim nws mam li rov qab haus dua.



Thaum lub hwj ntawd tas lawm Charles nkawd muab lub hwj ntawd hloov ua lwm yam ua ke nrog rau lwm cov hwj uas nkawd tau khaws tseg thaum nkawd yuav mis nyuj thiab kua txiv hmab txiv ntoo. Charles nkawd kuj muab tej lam hwj iav thiab tej kos poom aluminum hloov ua lwm yam thiab. Koj ua tau li ntawd thiab.



Thaum muab khoom hloov ua lwm yam, tej khoom no lawv nqa mus rau ib lub tsev ua khoom es qhov chaw ntawd siv tej khoom no los ua tej yam khoom tshiab. Cov kos poom aluminum qub yuav muab hloov los ua cov kos poom tshiab, cov thawv ntawv qub yuav muab hloov los ua ib co thawv ntawv tshiab, thiab cov hwj yas thiab cov taub yas qub yuav muab hloov tau los ua ris tsho, ntoo thiab kas pev.



Neo qab ntsoov kom yuav tej yam uas koj siv tau tag nrho xwb, rov qab siv tej yam uas koj rov qab siv tau los sis muab tej yam ntawd rau lwm tus neeg uas siv tau, thiab muab txhua yam hloov ua lwm yam uas koj hloov tau. Ua li no yuav ua kom cov khib nyiab uas koj muab pov tseg tsawg zuj zus mus, thiab yuav pab peb ncav kom tau peb lub hom phiaj kom “tsis txhob muaj khib nyiab hlo li.”

